

■ TRIBUNA POLITICA

«Jau, tut, immediatamain»

DA MARTIN JÄGER,
CUSSEGLIER GUVERNATIV

La persuna che scriva è Lussa già passa 50 onns interessada a la politica, ed ultra da quai sun jau ussa già dapi bundant 20 onns schizunt in uschenumnà «politicher da professiun». Creschì si sun jau ad Aschera en il Partenz, a la Scola media evangelica. Mia generaziun da scola era extremamain activa sin plaun politic. Uschia sun jau entrà cun 16 onns (pli giuven na dastgavan ins betg esser) immediatamain en il «parlament da giuvens dal Partenz». Là avain nus – in pèr giuvens socialistis – furmà ina fracziun, inoltrà intervenziuns e discutà animadamain cun ils auters commembers dal parlament. Quella giada eran nus daventads politicamain activs tranter auter pervia da la Guerra dal Vietnam. Jau ma regord anc bain co ch'il president dals Stadis Unids da l'America, Johnson, ha cumenzà l'avust 1964 – suenter l'uschenumnà «incident da Tonking» – a bombardar il nord dal Vietnam. Nus cumbattevan per la pasch en in pajais lontan che nus n'enconuschevan betg propi e dal qual nus na chapivan insumma betg la lingua. Il placat cunter la Guerra dal Vietnam che nus avain dastgà pender vi da la porta da la chascharia dad Aschera è sparì en moda misteriosa. Onns pli tard, cur che jau hai survegnì – sin dumonda – mia fischa da Berna, hai jau vesì che quel placat era vegnì tramess quella giada dal post da polizia dad Aschera directamain a la polizia federala.

Durant nossa giuventetgna avain nus



cumbattì per la protecziun da l'ambient, cunter las ovras atomaras e cunter l'export d'armas u er per il dretg da votar da las dunnas en Svizra. Nus ans essan engaschads – savens en moda vaira naiva – per in meglier mund, per democrazia, per egalitad e per libertad. Nossa atgna iniziativa per l'introducziun dal dretg da votar da las dunnas en la vischnanca dad Aschera ha fatg naufragi pervia da memia paucas suttascripziuns.

Quai è passà. Oz vegnan las persunas che s'engaschan sumegliantamain per ils ideals menziunads designadas sco «softies» u sco «bunatschs». Oz, en l'era da l'individualissem gnervus, ha l'altruism, il sguard nobel e generus vers ils auters, in stan cleramain pli grev. Empè da «salvar» il grond e vast mund pensan ins bler pli gugent a ses agen bun dretg ed a ses agens problems. Natiralmain ch'ins tema – gist suenter l'ultima elecziun en l'America – las consequenzas da la midada dal clima u ch'ins detestescha il fatg ch'ils dretgs umans na vegnan insumma betg resguardads en la Republica Populara da la China. Tut quai tutga la finala oz tar il bun tun. Ma dal tablet il

pli nov «made in China», da las vacanzas da discount en Tailanda u dal t-shirt da bittar davent per ina super notg da party na vul ins tuttina betg desister. Pertge er? La finala fan er ils auters putgads. Ch'els salvian l'emprim il mund! E zac sgolan ins per ina fin d'emna prolungada a Londra u schizunt a New York per far cumpras.

Ina part bler memia gronda da nossa societad viva evidentamain tenor la devisa «jau, tut, immediatamain». Che quest egoissem chaschuna gronds problems ecologics e ch'i na po betg cuntinuar uschia da princip, san ins, ma apunta: Pertge jau, sch'er ils auters betg?

Tuttina èsi in fatg incontestabel: Dapi decennis vivain nus – en ils pajais ils pli sviluppads – lunsch sur nossas relaziuns. Ed anc adina sa basa la creschientscha che vegn aspirada praticamain da tuts en la politica, en emprima lingua sin l'augment da la quantitad e sin il consum complementar.

Sche jau dastg guardar süss enavos sin in mez tschientaner d'interess politic e d'activitad politica è mia bilantscha vaira ambivalenta. Cun nus en Svizra vai uschè bain sco anc mai. Noss sistem da scola, noss fatgs da sanadad, nossas infrastructures èn sin in nivel optimal. E tuttina: Ils umans n'èn strusch daventads pli cuntents. Ed ils problems globals da l'ecologia e da la surpopolaziun vegnan ad ans occupar ils proxims onns e decennis adina dapli, schebain che nus essan evidentamain campiuns mundials en ignorar e sbittar.